

domini Iohannis Dei gracia pape XXII. predicti regulares observancias et alia, que fraternitatem ordinis respiciunt, ibidem perpetuo faciat observari. . .

1321. Ne in ordinacionibus sacrosancti ordinis nostri sit aliquid superfluum vel eciam defectivum, moderacio omnium penarum, reformatio omnium statutorum contentorum in libello diffinicionum capituli generalis et diffinicionum annalium dominis de Pontinnigaco¹, de Morimundo, de Pruliaco² abbatibus vel eorum duorum in absencia tercii committitur in plenaria ordinis potestate. Item, peticio abbatis de Ebera, qui petit, quod servicium de corona domini fiat per totam Alemanniam, exauditur et quod magnifici principis domini regis Bohemie, qui petit, quod in die resurrectionis dominice, in qua sol iusticie Christus Iesus cum glorioso comitatu ruptis vinculis mortis victor processit ab inferis, in monasteriis regni sui et eciam in aliis domibus ordinis nostri, dummodo conventus consenciat et de patrum abbatum licencia fiat processio per ambitum cum Responsorio Si consurrexistis et ante scilicet Cum rex glorie et Sedit angelus, pro sui reverencia exauditur.

1323 . . Item, colleccionem pecunie pro fabrica sancti Bernhardi Parisius per regnum Alemannie, Bohemie et Polonie committit domino de Ebera capitulum generale, ita ut quicumque abbates vel abbatisse non solverint, possit compellere solvere ad solvendum duplum plenaria auctoritate predicti capituli generalis.

1324 . . Cum frater Hermannus de Heldrich monachus de Lancheim³ cum quodam socio suo in sue salutis discrimen per seculum evagetur, multa enormia in vituperium ordinis committendo ac eciam non contentus excessibus ecclesiam predictam invadere et ipsius personas et bona diripere non veretur, generale capitulum mandat omnibus abbatibus illius provincie, quatenus eos predictos malefactores singulis diebus dominicis in capitulis suis publice excommunicatos denuncient et capi cum expensis proprii abbatis faciant carceri strictissimo detinendos, et si necesse fuerit, ad hoc potenciam brachii secularis advocent ad huiusmodi faciendum. . . .

1) Secunda Cistercii filia; ibid. p. 4. 2) Preuilly = Prulliacum in episcop. Senonensi. 3) Langhemium = Langheim haud procul a Moeno supra Bambergens. vid. Janauschek p. 28.